

Opljačkan Mark Rože u Mostaru

Francuzu ukraden džip sa tri stotine knjiga


Mark Rože od 2000. godine razna djela čita idući po svijetu. Odlomke knjiga čita po bibliotekama, školama, staračkim domovima, zatvorima, kafanama, a dan uoči krađe čitao je u Stocu

SARAJEVO - Francuz Mark Rože, koji živi čitajući književna djela i pješačeći po svijetu, boraveći u BiH u nedjelju naveče ostao je bez džipa u kojem je oko 300 knjiga neophodnih za njegovo putovanje.

"Pljačka se desila u noći između nedjelje i ponedjeljka ispred pansiona 'Most' u Mostaru. Prijavio ju je vlasnik pansiona Meho Zuja u ponedjeljak ujutro. Policija je o ovoj krađi obavijestila MUP FBiH i RS. Još nismo dobili povratnu informaciju od kolega. Vozilo nije pronađeno, a naznake o počiniočima nemamo", kazao je juče Srećko Bošnjak, portparol MUP-a Hercegovačko-neretvanskog kantona.

Mark Rože od 2000. godine razna djela čita idući po svijetu. Ulomke knjiga čita po bibliotekama, školama, staračkim domovima, zatvorima, kafanama, a počeo je u Bejrutu. Rože u Mostaru boravi već pet dana, a dan prije krađe, u nedjelju je čitao u Stocu. Jučer je, kaže, htio nastaviti svoje putovanje po BiH. Trebao je stići u Sarajevo, a nakon toga 18. decembra planirao je na mostu "Mehmed-paša Sokolović" u Višegradu čitati ulomke iz djela "Na Drini ćuprija", bh. nobelovca Ive Andrića.

"Želio sam rano krenuti put Sarajeva. Izašao sam oko četiri sata ujutro da prošetam po Starom mostu, da saberem utiske, zapišem



Ukradeni auto i Mark Rože

NN FOTO

neke crtice s ovog putovanja. Auto je bio prakiran kod pansiona 'Most', međutim, kad sam se vratio, nije ga bilo", kazao je Rože plačući.

"Užasno se osjećam. U autu je bilo oko 300 knjiga, pokloni za djecu bez roditelja i foto-albumi. Molio bih one koji su ukrali auto da mi vrate knjige i poklone, auto

mi ne treba, neka ga uzmu, samo nek mi vrate knjige i poklone koje sam pripremio za tu dječicu, jer ide Božić i Nova godina", kroz suze dodaje Rože.

On je 1996. godine osnovao Udruženje "Put knjige", a ideja da ide po svijetu i čita knjige "sinula" mu je 2000. godine u Bejrutu, jer su ga ljudi tamo za vrijeme seansi

čitanja izvanredno dočekali

"Ljudi me nikada nisu iznevjerili. Sve vrijeme kod njih sam osjećao potrebu za pričama, želju za dijeljenjem. Isti osjećaj je svuda, gdje god da dodete, u bilo koji dio svijeta. Tri godine mi je trebalo da ostvarim svoj san, i vidite sad...", priča Rože.

M. LINGO